



**Geschichte der geistlichen Stiftungen, der adlichen  
Familien, so wie der Städte und Burgen der Mark  
Brandenburg**

[Urkunden-Sammlung für die Orts- und spezielle Landesgeschichte]

**Riedel, Adolph Friedrich**

**Berlin, 1863**

CXCVI. Entscheidung des Cardinals Albrecht zwischen Busso von  
Alvensleben und Joachim Klitzing über die Dompropstei zu Brandenburg,  
vom 4. Januar 1519.

---

---

**Nutzungsbedingungen**

[urn:nbn:de:hbz:466:1-55861](https://nbn-resolving.org/urn:nbn:de:hbz:466:1-55861)

CXCVI. Entscheidung des Cardinals Albrecht zwischen Buzfo von Alvensleben und Joachim Klitzing über die Domprobstei zu Brandenburg, vom 4. Januar 1519.

Nachdem vnd als Irrunge vnd zeweileuffte erwachsen sein der Probstei halben zu Brandenburgk zewuschen dem Hochgebornen Fursten, Hern Joachim, Marggrauen zu Brandenburgk, Churfursten etc., vnsern lieben hern vnd Brudern, vnd seiner liebden presentirten vnd Insituirten zu obgedachter probstei, nemlich dem hochgelarthen wirdigen vnserm andechtigen vnd lieben getrewen Ern Bussen von Aluensleuen, doctor, eins, vnd Ern Joachim Clitzinge, Thumhern zu Magdeburgk etc., anders teils, welche Irsall vnser lieber herr vnd Bruder, auch doctor Buzfo vnd Er Joachim, semplich vnd igklicher In sunderheit zu vnserm mechtigen vnd entlichem ausspruche volmechtiglich gestalt haben, demnach Sprechen vnd erkennen wir Albrecht, von gots gnaden der heiligen Romischen kirchen des titels sancti Chirifogoni priester Cardinal, Ertzbischoff zu Magdeburgk vnd Mainz, primas, Ertzcantzer, Churfurst etc., das vnser lieber herr vnd Bruder, Auch Doctor Buzfo vns zu gefallen willigen wollen vnd sollen, das auff der Probstei zu Brandenburgk Ern Joachim Clitzinge sein lebenslangk alle Jhar viertzig gulden pension sollen referuirt werden, doch das das Referuat auff sein Ern Joachims darlegen vnd Expens werde erhalten vnd erlangett. Zcum andern, das vnser lieber herr vnd Bruder Ern Joachim Clitzinge einen gnuglichen schein mit seiner liebden brieue vnd Sigill gebe, der Substanz, wenne vnd welchermaß kumpfftigklich die probstei zu Brandenburgk ledig wirdet, das sein liebe Ern Joachim Clitzing dorzu vor alle andere presentiren wolde. Zcum dritten sol Er Joachim Clitzing constituiren In der behften forme, wie gescheen kann, fsal vnd magk, alle Procuratores Im Hoff zu Rome, In gemeine vnd etzliche, welche Ime doctor Buzfo namhaftig machen wirdet, In sunderheit alle seine gerechtikeit abzutreten, zuzustellen, zu geben vnd zu transfundiren doctori Buzfoni Aluensleue zu seiner vorigen erhaltenen gerechtikeit obir gedachte probstei, litem vnd lites alle vnd igkliche zu extinguiren vnd alles, was sunst hier Innen mehr noth sein wirdet, zu thun, keynerley aufgeschlossen. Zcum virden, nachdem Er Joachim Clitzing vil Expens vnd vnkost diser Irrungen halben gethan, Szollen demselbtigen zu erlegunge zeweyhundert gulden widdervmb gegeben vnd entricht werden, vnd dieweill dan Er Joachim Clitzing Hochgedachten vnsern lieben Hern vnd Bruder, den Churfursten, mit etlichen vormeinten vordrieslichen worthen schriftlich vnd mundtlich angerurt hadt, das darvmb vilgedachter Er Joachim Clitzingk sich zcum forderlichsten zu seiner liebden fuge vnd dieselbige seine liebe mit demutigem emfligen vleisse bitte, Ime sulchs gnediglich zcuuorgeben, dorauß Ime auch gnade widdervmb soll zugestalt werden. Vnd sollen hiermit alle gebrechen, wie die bisher In obberurther sachen erwachsen sein, vffgehoben vndt entscheiden sein, die wir auch hiermit vnd auß crafft Irer vollkommen gewaltgebunge auffheben vnd scheiden hiermit wissentlich, vnd sollen bey den penen, dorbey sich ein Igglicher vorpflicht hadt, alle oben geschriebene stuck, punct vnd artickell von igklichem teil In gemein vnd sunderheit gehalten vnd vorfolget werden. Dese zu wahrer vrkunde haben wir vnser Ingesigel an dießen brieff gehangen. Gescheen zu Halle auff sandt Moritzburgk, Dinstags nach Circumcisionis domini, anno etc. XIX.

Aus dem Receßbuch Erzbischof Albrecht von Magdeburg de 1515—1529 im Königl. Prov.-Archiv zu Magdeburg.